

四庫全書

集部

欽定四庫全書

盤洲文集卷二十三

宋 洪适 撰

外制五

王之望端明殿學士提舉江州太平興國宮制  
朕圖回治道招顯時髦縱壑相須聚精神於左右墜淵  
為戒全進退於始終錫此明綸責於近輔具官某降材  
足用抱器不羣茹古涵今明于先王之術本仁祖義列

於君子之林蚤列通階屢分劇職名節遠來於巴蜀戎  
旃持摠於江淮言兵體之三章自許興邦之策堅帝意  
以十事載嘉尊主之忠迺繇諫坡遂躡政地冀素懷之  
底績能剴任而有為命其復往視師濶焉久不聞問國  
人皆曰可去謂尚出於私心臺評以汝為傾殆勿容於  
公議念股肱之舊弼推體貌之優恩畀以真祠班之秘  
殿俾遂燕閒之志當無喜愠之容噫孔子失之宰予蓋  
知人之不易成湯至于帝乙何謀國之皆賢其服寵光

尚思報塞

敷文閣待制朱翌左朝議大夫制

三年而計羣史若稽陟典之文繁日不離小官獨減從  
臣之考茲協銓曹之格寔彰名器之公具官某學問淹  
該詞章典贍右坳書事馬遷有良史之材而振出綸蘇  
頤為代言之最論思皆本仁義吐茹不以剛柔厄彼讒  
波久於炎嶠晚逢更化連命承流撫字不諱其勞循良  
無媿於古雖奉祠而養氣蓋遷秩之應條其服明綸以

暢榮問

韓彥古太府寺丞制

吾以北鄙有釁命爾祖先世之部曲以圖上其方畧爾奮然願行無避難之色歸奏便殿雍容可觀顧雖攝事卽聞而雉監猶須汝也司府之屬俾復其舊往踐厥官則朝有著矣

江淮都督楊存中父震秦國公制

古語云三代之將道家所忌儻世濟忠義則福祿鼎來

遠而有耀矣道家之忌豈其然乎具官某弢略傳家盡  
力邊圉父子死敵名藏金匱天之報施乃在嗣賢久典  
戟衛受知兩朝以槐衮齋旄而賜真王之履以碧幢黃  
鉞而顯督府之威茲遇郊釐益光禰廟咸秦之國載敵  
舊疆英爽不亡尚克嘉此

王天覺循資制

兵出西方人百其勇第功行賞小大不遺爾名在轅門  
戰功有績進秩一等用示恩榮

王師心知湖州制

朕巡守三吳以苔雪為藩輔疇咨九牧欲台杜之人材  
得此良翰諧於僉屬具官某望實高嶷材猷碩膚再登  
獻納之班獨抗忠嘉之論孟容還制多士想聞其風山  
濤執銓人物各為之目郡章再綰師節五移拔薤本以  
抑強嚴霜可畏憩棠陰而聽訟白日顯行凡牧人御衆  
之方無槩植索塗之患茲選吳興之守孰踰禁密之英  
賴善政有以撫綏則斯民不復愁嘆往振其職永孚于

休

虞允文父祺太子太師制

蜀道文儒之林也在西漢時嚴馬淵雲稟靈江漢擅聲  
四海後來仰之如慶雲景星曾未聞父子繼美及致身  
鼎輔者我宋勃興異材間出高視前古世載其英具官  
某包括羣書洋溢嘉聞登名月窟仕不隆振儲休子舍  
大其門閭光踐鴻樞兼握政柄聚精會神景行夔高宮  
師褒祿制墨未乾茲講神釐復申卹冊以彰教忠之訓



以慰顯親之心沒有知也尚榮享之

周時夔路運判制

蜀道去朝廷幾萬里更有讐郵御史風聞所不及民有  
冤枉不能踐理匭及臺省之庭與我仁民而戢吏者其  
唯賢部刺史乎爾文史足用稱有吏能蜀人也又嘗治  
蜀之郡習於蜀之故也握此漕節是必振其職矣

張子蓋妻封國夫人制

朕考功伐而思虎臣旣褒其祿又擢其孤猶以為未也

顧其平生忠義不以家為者皆伉儷之賢有以相貳之  
某氏端肅之行柔明之性稱於宗黨宜其閨門子蓋扞  
馬邊城嬰疾不壽使爾有未亡之嘆而感伊威之詩也  
茲廣脂封胙以成國庶幾乎石窳之意

薛良朋知臨安府制

尹京之任亦難矣趙張三王擅名於漢後世猶議其明  
者傷於太察嚴者傷于太猛鮮克有終殆以是乎國家  
之都上京也尹正者皆輔弼之儲其望崇其權重可以

不憚大吏可以不避彊禦懷私者不得而撓之依勢者  
不得而搖之故其威易立其政易成今暫蹕吳中名同  
而實異責重而勢輕故居之者為尤難爾整煩撥劇裕  
而不迫接物處事和而有立使節州麾名震中外靡人  
不以爾為材也疇咨四岳擢爾天府當官而行思善其  
後

趙渙江東運副制

都城之外其權重者無出於部刺史百史之升黜一道

之戚休係焉寬則人無所憚蔽則萬事不理猛則澤不下流傲則情不上達傳不云乎過猶不及二者之失等耳爾材而甚健人謂素剛屢秉使輅亦旣白首今予命汝持江左之節平其心守其局則汝之職舉矣

吳芾吏部侍郎制

朕疇咨與誦品覈實能與其彈壓都城勞以謀訟倥偬之事豈若澄清選部振其銓總公平之休弊必務於盡除任弗嫌於數易具官某識邃以敏材周而通再入中

臺乃率秋官之屬暨居東省嘗分夕拜之權擇良牧以尹京輟貳卿於司列甫踰月律已播治聲雖稱職可嘉在前孰出其右然審官既闕至今未得其人妙簡周行俾尋故步夫鏡明則塵垢不止衡舉則輕重罔遺惟吏姦有鈐制之方則仕進免滯淹之歎益行已試之效用廣無窮之稱

黃鈞國子正闕耆孫國子錄制

朕懲省官之非廣翹材之路博士員咸復其舊輔臣謂

爾通經術善屬文西州之英也召對可采列之學職勉帥以正無負推擇

周用之循資制

朕以慈闈有天地之德顧無以報之日者奉寶冊尊徽稱辨治之吏序勞進秩爾其一也祇此恩渙思稱所蒙鍾世明復直徽猷閣知廬州制

合肥重鎮也新遭兵革之難民失其居朕誦鴻鴈之詩謀方伯之寄命從臣御史之公選可勝任者爾翔歷中

外久有能名薦牘鼎來會言無間茲甫起爾譴域界爾  
帥節還爾美職爾其以誠報國以仁撫民以智守邊以  
材集事使歸者輻輳閭里熙熙田疇日闢則諸大夫無  
失舉之責矣

汪澈端明殿學士知建康府制

十國為連莫重高牙之寄兩都相望實兼留鑰之雄爰  
出華章式崇舊弼具官某量包山藪識並蒼龜有貫穿  
今古之學而尊其所聞有酬酢事物之材而見於歷試

忠臣謂之骨鯁獨振臺綱執政具猶股肱嘗參國論制  
荆襄之專閫息疆場之外虞久憩叢祠甚淹遠業茲聽  
與人之誦俾還祕殿之班護我日畿鎮夫天塹惟虎踞  
龍盤之壤莫府既尊則雞鳴狗盜之姦非謀自寢往圖  
綏撫用副倚毗

姜詵兩浙運判制

王畿千里外臺耳目之選非它道比也以爾久于官路  
綽有能名揭節閩川及瓜而代畿漕闕員肆以命汝惟



明則能察吏姦惟公則能革衆枉惟勤則能辦王事母徇私以干譽母媚上以害民十目所視可不勉哉

倪偁太常寺主簿制

簿領雖卑奉常蓋禮樂所自出有列其間則與聞稽古制作之事他寺不可同年而語也爾強學好脩久率多士俾造稷嗣益觀所長

錢端禮參知政事兼權知樞密院事制

朕居域中之大以天下為公念立政之維艱孰稱前疑

之任儻量材而可倚難拘左戚之嫌書贊稽乎人情典故存於國史具官某學該古訓名著清蹕憂時極饑渴之思致主出忠嘉之縕下王恢之議終始未嘗異同成魏絳之功南北以之休息自登石府兼贊中臺見施置之無私喜規撫之可久都俞契合猶伯牙之操遞鍾典領雍容蓋庖丁則有餘刃其參國秉共立邦基仍尊惟幄之籌匪專俎豆之事家聲不墜臣節甚休噫二百載而中天欲顯祖宗之烈三十輻而共轂所資輔弼之良

勉奮爾庸以濟于治

虞允文同知樞密院事兼權參知政事制

朕仰承慈訓光紹慶基經武整軍莫重本兵之寄移風易俗常懷修政之難時有異材助吾上治具官某學周賈變識緼經綸運堂上之奇兵方顯兼資之略掃舟中之敵國遂成無競之功茲陟宥庭仍禪政路已見贊襄之効庸知密勿之長離婁燭千里之隅物情難隱柳下奮百世之上時望浸高宜副斗樞併參天緯所賴股肱

之助無復毫釐之差噫衆賢和於朝當法臯夔之迹一  
相處乎內非專周召之權益展英規用隆華問

王剛中端明殿學士僉書樞密院事制

國家以得賢為重人臣以逢時為榮況登四近之班實  
應三階之象惟邦之彥非朕可私具官某誠惓惓無華特  
操不倚學有根柢而抗以高明之識言無枝葉而發為  
典則之文附翼攀鱗蚤從容於宮邸捫參歷井獨振耀  
於藩垣趨節召而復來聽履聲而可識虞夏之書渾渾

爾方推禁苑之長伊望之業凜凜乎宜陟籌帷之列所  
資忠力同起治功噫尊俎可以折衝蓋茂明於上策股  
肱其惟執政無專美於前英往體至懷奚俟多訓

魏昂魏昌承信郎制

爾父盡忠報國死於行陣恩及存沒不一而足咸畀命  
秩勿墮家聲

胡昉直祕閣知盱眙軍制

邊城新遭戎馬之難勞來凋瘵必惟其人爾少長淮壖

習知風俗寓直中祕超分郡符無輕一障之乘遂媿鴻鴈之雅

魯嘗太常丞周舜元太府丞魯可封將作丞制九寺三監之屬嘗合丞簿為一今還其舊所以開搜材之路也嘗決科之久達於禮文舜元名卿之子習於財賦可封學古而仕幹用有稱為官擇人分佐其長各思盡忠無或負丞

唐輅大理司直制

獄人之司命也吏或巧心析律高下其手使無辜者遭  
刑罰豈為民父母之意哉故選儒臣為司直所以申其  
枉也常思名官之旨則人無冤矣

龔滂國子正制

褒衣博帶之儒露其顙者咸集於膠庠表正之官未易  
居也爾博古知今鄉曲有譽力行所學用副選掄

祝閔利路運判徐人傑江西提舉常平制

部刺史握澄清之柄動搖山岳震懾州縣用匪其人下

則受弊爾閔夙有吏材再任蜀道就持漕節以饒王師  
所以省送往迎來之費也爾人傑儒林之老久列郎闈  
俾陟倉臺以臨江右所以徇更迭補外之請也繩姦摘  
伏思振六條寬我遠懷時爾之職

陳輝知廣州制

番禺為一都會象犀珠香之湊見者惑之貪泉之詩所  
為作也遐萌隔於朝廷連率係其休戚必得文武威風  
知大體者廼稱其選以爾老子宦途飾以儒術蘇枯鋤



強勇於去弊旌旗蓋海南伯甚尊昇爾重權用竦報政  
思濟斯民以稱朕仁不異遠之意

竹友直循資制

日者宿衛置使大開莫府爾名在籍中厥有賞典進秩  
之榮國不失信

韓懋胄循資制

國家除戎器以藏武庫嘗下諸郡作甲爾能勤其官先  
期趣辦爰進一秩示信賞也

左迪功郎龔總父紱封右承事郎制

朕以孝治天下推紫壇之澤于有官君子凡鮐背鯨齒  
之老有子列于仕籍者咸得而寵光之爾脩身齊家耄  
期稱道義方之訓著于鄉鄙載增命秩以為爾桑榆之  
榮

馬希言太府寺主簿制

有列于朝者搢紳之選況九寺之屬乎爾摠領工巧勞  
於辨職司府勾稽肆以命汝往欽而長益勤其官

胡堅常直秘閣知盱眙軍制

盱眙新創於兵數月之間郡將三易遴擇其人將以徠  
流亡而通互市爾贊貳京邑咸謂有材召對便朝占對  
可喜寓直藏室畧以虎符能振其職則吾無北顧之憂  
矣

洪藏大理司直制

法家者流或用刑定罪安忍深刻失先王仁恕之意司  
其直非儒者安歸乎爾名父之子顯門擅業往踐其官

必能以古義決疑獄也

袁震循資制

日者北鄙有釁慈宮視師江上凡扈從之吏無小大畢進其秩爾名在籍中宜受茲賞

李暉降官制

爾掌征商之事課損於常宜在大譴之域又訟其僚驗之無實并按爾罪欲不懲可乎奪官一等省我寬科

朱華孫降官制

爾為縣大夫吏有乞取之姦而懵不知覺緡錢會計差  
舛豈無雀鼠之可疑也寧失不經姑用貶秩服我寬典  
思蓋前愆

知贛州趙公稱復直祕閣制

朕慕西漢良吏之盛故信賞必罰循名責實祖述孝宣  
之政爾頃坐小過失中祕之直既更大青而治聲達于  
朕聽還爾舊物思所報焉

盤洲文集卷二十三

欽定四庫全書

盤洲文集卷二十四

宋 洪适 撰

外制六

張孝祥復集英殿修撰知靜江府制

炎嶠分疆八桂獨為善地有唐重外九牧多用詞人我  
得良翰可寬遠慮以爾性識超詣學問紛綸抱昂霄聳  
壑之材利斂錫淬鋒之器廣廷對策諸老生莫敢抗衡

兩禁代言他學士至於閣筆典股肱之劇郡掌管鑰於  
留都治有能名庭無逋事賸遐萌之未艾咨南伯而匪  
輕稍還論譔之班往重蕃宣之寄推埋或奸法令當去  
渠魁溜橐之在州閭盍新軌轍國須賢立吾不汝忘

李珂改官制

仕者滿六考有薦者五人然後脫身小選亦可謂難也  
已矣爾好學能文嘗見推擇便坐賜對詳整可采躋之  
王官非常典也思我恩渥有以稱之

劉芮湖北提點刑獄鄭丙湖南提舉常平制

部使者分耳目之寄職有劇易而澄清之權等耳爾芮  
恬於勢利論議不阿爾丙材資敏明知民疾苦持節重  
湖蓋未久也易地而處僉曰允哉或揔岸獄之柄或行  
斂散之政使人無冤事無弊則惟爾之休

張訓通復官制

失律喪師罰難苟免青災肆赦澤所不遺爾久逮戎行  
嘗廟敵壘治弃甲曳兵之罪已有嚴誅推息黥補劓之



恩稍還舊秩勉圖後效用蓋前愆

魏彥轉官制

山越弄兵騷我嶺表爾控弦擐甲力挫妖鋒解圍擒敵  
厥功茂焉爰陟榮階書之勇爵益圖忠報嗣有恩光

劉淑贈官制

爾氣吞羣盜履刃登鋒拳勇無前沒身流矢爰加祿典  
併錄遺孤三泉有知榮此恩渙

孫諒轉送郡刺史制

羣盜蟻聚五嶺窟驚遠聞獻馘之音可後踰時之賞爾  
精忠自奮沉勇無前獨提虓虎之師遂清狡兇之窟界  
之州紱夸爾戎旃當令黃木之灣不見綠林之迹益思  
功效嗣有恩褒

吳揆轉五官太府寺丞制

太府掌貢賦之貳而頒貨賄于受藏之府蓋周之舊官  
也爾材器莊粹佩服義方萬里侍行西平有子俾丞九  
寺仍陟五階用增濟美之休且示褒忠之眷往涉其筆

以對恩光

吳柄轉五官直祕閣賜紫章服制

朕注意元戎遠馳名節晉書三接未盡褒賞之恩爾教  
忠有訓稱其家兒躡進文階俾直中祕仍錫金章之寵  
式增綵服之光

周夢若母許氏封孺人制

朕竣祀紫宮推澤遐邇彩纓仕路者其親九帙則有圭  
組之榮與夫湯沐之邑所以教天下之孝也爾壺範之

賢擇鄰有訓龐然華髮逢此恩榮用增三釜之歡以彰  
四德之報

莫延庵承信郎制

爾弃其故土慕義來歸載嘉忠忱宜有褒異俾躋仕版  
用示恩榮

彭昇貴州刺史制

右列以遙郡為榮非異恩不能到也爾嘗扈惡殿積有  
勤勞寵之州旗宜思忠報

王淪浙西提點刑獄竇敷潼川運副制

坤維吾西土也距朝廷且萬里吳中吾駐蹕之所也外臺去天纔尺五朕視其地如戶庭視其人之休戚如一身未嘗有遠邇之間分道置使厥選匪輕爾淪嘗持閩節有澄清之譽茲用命爾察刑于近畿爾敷嘗典蜀郡有平易之政茲用命爾轉漕於舊壤能使民不寃用不乏官不媮吏不蠹則爾之職舉也

薛鳳國子正李翔太學錄制

士不遠千里而來使其漸摩道義循服規矩則表儀之  
列可非其人乎爾鳳爾翔儒之秀傑其推正心誠意之  
學以助我長育之教

魏吉甫大理評事制

孔門高弟片言可以折獄周書有訓兩造然後聽辭爾  
詳練法令宜列理官欽哉欽哉毋寧上下其手

凌景夏復敷文閣直學士制

朕禮神頌祇已用上辛之吉滌瑕蕩垢率循令甲之常

惟時從臣未獲舊貫爰推茂渥實采僉辭具官某識遠  
經邦量函德宇出入久乎中外聲名著乎邇遐重鎮撞  
牙邊邊衝於樽俎清蹕聽履振公道於銓衡頃出多言  
退休閒館茲廣奉壇之澤俾還內閣之班往服綸恩以  
需節名

資政殿學士湖南安撫使黃祖舜轉一官致仕  
制

輕裘制閭遠馳葺蠹之聲方幅叩閣遂露抽簪之請勉

從雅志用出襮書具官某識洞眇綿量苞廣博糟粕不  
膠於紙上經綸自得於胸中有嘉憂國之誠屢納庇民  
之說榮躋樞極陳泰階六符之經任重藩垣修方伯連  
率之職正仰折衝之效遽高知止之風眷此老成閔勞  
以事增之品秩式寵其歸往佚鄉枌益迎壽祉

李如同磨勘制

三年而計羣吏若稽陟典之文繁日不離小官獨減從  
臣之考茲協銓曹之法實彰名器之公具官某識探道



原智優治具司刑禁路鞠茂草於園扉敷惠藩方美甘  
棠於南國奉叢祠而通志增華秩而應條往服恩綸益  
休廣譽

梁俊彥轉送郡刺史制

朕患陟典之濫或

缺

其法自貴近始所以奉三

無私也爾蚤齒

缺

文史典司官維能勤其官環

列序進訓齊

缺

紱之榮與

缺

類等益思忠恪以對

光寵

周癸封宜興縣子制

朕嗣守洪基肇裡紫時當路寢齋居之日霏雪甚繁暨  
閔宮朝獻之辰陰雲盡解克竣熙事爰布慶條若時舊  
德之臣宜出明綸之命具官某深忠許國遺直事君非  
堯舜之道不陳同熙庶績殆管晏之佐弗及咸仰貴名  
屬三歲之親祠值四郊之多壘建改卜之議能稽皇祀  
之成規迓涓成之休遂展泰元之大報會有燕間之請  
莫陪顯相之儀茲舉典章用開爵邑噫致齊侯之昨有

考舊聞受宣室之釐敢懷專鄉益綏善履用對恩褒

王之望封襄陽縣子制

朕遵舊規於

缺

變熙事於一陽啓蟄而郊協魯國

駢犧之祀獲獸以饋若漢代白麟之章旣歲上儀用推  
慶澤具官某忠規致主壯志絕人闕紫闥而攀台階榮  
登六太穆天綽而經國體密贊萬幾緬惟消選之辰實  
參改卜之議偶休閒館莫相明禋茲疏穀璧之封乃荒  
菜食之邑噫百神咸秩已格嘉虞之休萬福來同敢懷

專鄉之意更綏吉履用對恩輝

黃祖舜贈五官制

祿賢褒德稽載

闕

崇終存有邦之典令若時

峻望嘗列

闕

方覽桂冠之章忍聞易簣之語告其居

第出此卹書具官某器局沉深風規直諒傳孔孟聖賢  
之學入淵騫德行之科卿佐是謂股肱久運中樞之畫  
俎豆嘗聞軍旅爰分方面之權羽淵忽夢夫黃能長沙  
果集乎子鵬命之不淑識者咸嗟用增幽壤之榮沓進

文階之品尚其不泯歆此猶生

劉立等轉官制

爾等頃以軍興奔走郵置宜推賞澤用獎勞勤

高郵軍立功人轉官制

淮濱之役氛祲盤結爾等或被甲戰野或銜枚攻營第  
賞褒功咸進階秩益思忠力以對恩榮

權洮州趙令結妻包氏封令人制

爾夫身留異壤而王師薄於城下爾能率軍民望風歸

義忠壯如是女史所無宜錫令名以開脂澤使妾男子  
知所媿焉

楊貴等轉官制

西陲受敵百將同功爾賈勇奮忠斬首捕敵幕府差次  
宜陟榮階往服恩光益圖報塞

吳益轉右朝奉郎制

朕惕奉慈謀光臨寶祚嘗覃中外之慶靡分大小之臣  
具官某接物惠和宅心端栗披尋竹帛知師友之淵源

怡養丘樊玩煙雲之舒卷頃階戚黨蚤綴從班獲逢嗣服之恩寔應遷官之典益思謙畏用保寵榮

薛良朋進職制

人主以八柄馭羣臣予奪廢置猶雨露雪霜不可以偏廢也二浙歲惡不登民多菜色朕隱憫流徙食不甘味故坐視不恤如嘉如康祖如宥之者則絀之奉使稱職如書如閔者則陟之爾奉行不懈賑拯有勞顧不賞可乎進直河南尚勉之哉

姜誥進職制

朕哀凶歲之民軫殍野之慮棊菑之策靡不施行王城之外流亡四集今既數月矣幸而生存則可以返其田廬有司勞於賑恤者以次取賞寧過於厚所以勸勤事之吏庶幾乎廣我仁民之心也爾閱視凋委不懈厥職道山之暑時謂優恩益思其終以稱羣論

韓彥古轉官制

日者聚饑民於四郊分官吏稟餐鬻致醫藥爾攝承民



曹實參其事今生者可歸第勞班賞增秩一等以勸後之濟斯民者

吳揆駕部郎官制

郎位上應乾文為朝廷華輟爾有列卿寺訓墨未乾躋之司輿時謂異渥所以彰乃父教忠之訓也惟爾行安而節和必能恪居厥官以稱朕意

閻安中中書舍人制

朕考三代以來在兩京最盛文章渙焉可述莫非爾雅

之辭號令固有不臧初無替否之迹追還古始有待髦  
英具官某學聞丘墳聲諧韶濩決科文陛切直冠夫諸  
儒掌禮儀曹光燄輝乎儕輩介然有守卓爾不羣自入  
賢闕一新學法挾策負素者爭親乎模範蠟纓影組者  
咸仰乎規繩惟禁路之擇材輟師資而為誥雖出綸出  
綍欲求潤色之工為紀為綱尤賴論思之助往踐厥次  
時惟休哉

趙伯強承信郎制

爾父蒙盾援旌殞於行陣錄孤之澤所不可遺往即官  
聯式思所報

葉顥磨勘制

八柄詔王厥分爵祿之等三載考績率循法令之常雖  
列從班必遵彛矩具官某賦材碩大迪德忱恂蚤環轍  
於宦岐晚垂紳於要路秋官斷獄議者謂過于張文部  
曲銓衡時論號後于盧李茲因會課實應遷階庸出絲  
綸之褒庶增筆橐之重往祇恩渥益廣休聲

劉儀鳳磨勘制

設六卿之官是為通列考三載之績蓋踵前規若時禁  
密之臣亦限吏銓之制具官某淵源種學典雅擣詞自  
揮翰於南宮即主盟於北苑司馬掌九伐之法厥有弛  
張太史成一家之言正資筆削茲因會課實應遷階初  
非不次之恩庸示無私之典往祇茂命益暢美聲

吳璘判興元府制

漢中巨屏實蔽極邊闕外重權毋踰元老出茲言綽新

彼轅門具官某名

缺

武立凜凜中堅之望番

番上將之元建方

缺

谷以西寬遠顧缺雄心

於狼望之北獨蘊

缺

懷茲載戰於師干庸近移於幕府

九命作伯孰先倚愛之親十國為連益賴扞城之助副

吾注意知汝匪躬往究英猷奚煩多訓

王大寶禮部尚書制

朕遠覽周書尚猷詢茲黃髮若稽虞典疇咨汝作秩宗  
復起老臣甚諧輿誦具官某抗高明之識馳魁壘之名

紫橐嶢嶢並驅于禁路皂囊剗切殆獨步於諫垣雅  
操不移高風易退方奉祠而均逸忽上牘以遺榮緬懷  
骨鯁之英浸勞夢寐之想遠移一節旣無俟駕之淹載  
錫兼金寧有挂冠之執爰蔽朕志俾長春官蓋進德以  
尊朝期用儒而益國討論禮樂豈止玉帛鍾鼓之云獻  
納箴規庶幾几杖盤盂之戒往祇厥位惟爾之休

方滋權刑部侍郎制

朕俯酌人情若稽禁罔前之所是著為律具存畫一之

章爾曰勿宥惟厥中斯濟登三之政比申細札用戒祥  
刑疇咨明恕之才俾揔平廷之柄具官某縕沈深之識  
擅盤錯之能使節川麾殆艱難之歷試民風吏蠹無纖  
介之可欺輿議皆稱其賢三紀久勞于外宜持紫橐遂  
貳私官夫法令譬猶江河蓋易避難犯之義若文書盈  
於几閣有奇請它比之奸已扁鐫乎兩端唯科條於三  
尺其推朕意毋忽獄疑竚而稱職之休成我知人之哲

王承祖等轉官制

爾遠隨戎莫來造帝庭用陟官聯以示還歸之寵

唐閔國子司業制

古之君子經為人師行為人表故居一鄉則一鄉化在一國則一國治今朕羅天下秀異于成均侈袂方履閭閻秩秩不但取其庠聲序音之盛為美觀蓋欲養材器備官使也以爾擅顯門之學高月旦之評入朝十年恬於執利彌卻之德稱為醇儒比因使指之還嘗賜清閒之款占奏詳整簡在朕心往誨諸生思稱其職



王弗權戶部侍郎制

朕若稽仁祖嘗用許元雖增秩遷階至列賢科之籍而歷年玩歲不離財計之官蓋久其任而得人則盡其才而興利今朕此選將庶幾焉具官某智慮從橫材資超詣歷官岐而甚久惟心筭之最優通知食貨之源灼見公私之弊對之所陞嘉富國之謀猷試以版曹有裕民之方略其頗治賦之柄勿分約法之勞要當解瑟而變更毋或守株而苟且從班足可施設非錐處囊中之時

國用賴以贏餘貯錢流地上之效往追前哲嗣有褒章


鄭立改官臨安府知縣差遣制

賜對于昕朝易階于小選雖典章所有而恩不常出也  
爾粹于學問稱有吏材敷奏可嘉不誤舉者畿內壯縣  
用試爾能政績有成嗣將飾擢

韓彥古直徽猷閣知嚴州制

爾攝承省戶以語言之失罹于清議自詭治民吾以乃  
父勲藏盟府不汝疵瑕延閣汝舊物也嚴陵吾輔郡也

夫美錦尚不可使人學製况千里之寄乎爾其矯揉脩  
飭允蹈中庸使實惠洽于編氓則爵位可以長守敬之  
哉毋荒弃朕命



盤洲文集卷二十四

欽定四庫全書

集部

盤洲文集卷

二十五至三十

詳校官庶吉士臣初喬齡

主事臣呂雲棟覆勘

總校官編修臣王燕緒

校對官中書臣李斯咏

謄錄監生臣陳瑋

欽定四庫全書

盤洲文集卷二十五

宋 洪适 撰

詞科習彙一

戒諭諸將撫循士卒詔

勅朕嗣有令緒躬履多虞披榛莽而立朝廷未濟艱難之業聽鼓鼙而思將帥有懷屯戍之勞比雖通兩國之和詎敢忘五兵之備邊城密邇政擊柝以相聞戎幕崎

嶮亦暴衣而浸久慨此執戈之衆未知稅駕之期惟山林未息於馬牛致介冑尚生其蟣蝨風灑露沐日削月脔左親戚以相從舉室家而靡託興言至是軫念於中雖進元戎與叅密議每虞裨將未體朕懷或徂故常罔加存撫廬舍弗矜其燥濕糗糧或失於時宜有乖挾纊之恩靡徇投醪之義繇今以往毋蹈厥初其同甘苦之情仰副綏懷之意未能按轡親巡細柳之營儻遂縶弓即議缺之賞勉圖報効共享升平

令監司舉廉吏詔

朕聞上古之治百僚師師盡瘁竭節罔不清修淳白以振乃職勵乃事是以教化興行衆庶樂業咸以康寧朕承洪業託士民之上于今十有六年數詔有司務行廉白撫綏吾民將以配三王之隆明先帝之德也今吏率以貪漁為常年賊其民慢視厥職弗以經意而方繫之士飾躬自將挺然不徇流俗者又沉滯下僚壅於聞達薰蕕不同反罹訛毀部使者罔克聞知奉詔宣化如此

豈不謬哉方今國家少事繇役不興兵革不作而民多  
貧困失職厥咎安在是廉吏不興而貪吏未去也部使  
者不以為意朕將何任哉夫部使者位尊責重所使為  
朕外臺之耳目也其各公乃心廣及視聽歲舉所部廉  
吏一人上其功狀朕將識擢以風在位而律貪夫焉

令宗司舉賢宗子詔

勅朕猥以眇躬嗣承大業觀軫輶之象傷同姓之孤睽  
誦角弓之詩鑒前王而親睦思強王室廣用宗盟冀枝



胄之繁興為本根之庇蔭挺挺有祖風烈何獨舊聞顯  
顯為世豪英豈無佳士爰舉先親之典每防踰戚之非  
或剖竹分麾出界朱轡之寄或垂纓戴緹進叅紫橐之  
聯尚虞或抑於下僚未克盡躋於顯仕昔周家致治毛  
原迭位於公卿唐室多材程石繼登於鼎鉉曷於今日  
有媿前朝夫踈遠鯁生尚能謀國豈神明貴胄不可亢  
宗凡我懿親宜遵明詔雖行有九德惟知人之固難其  
歲貢二人則進賢而必賞益思汲引以副招求

御史中丞除吏部尚書詔

勅分職以倡九牧周寔重於列卿掌選而主三銓唐尤  
高於文部迺朝廷之貴職須識量之名臣朕得其人使  
率其屬具官某剛方缺任公正無私謙謙有君子之風  
蹇蹇勵王臣之操學通墳素酌道德之淵源才冠等夷  
游文章之林府久騫禁密缺首憲司嫉惡如讎觸邪罔  
避白黑分於轂下中外畏其筆端豺當道而不問狐狸  
王綱大振獸在原而莫采藜藿國勢愈尊爰升常伯之

聯俾典天官之務其考覈於流品無殺混於賢愚盡草  
類綱一清選部山岳動而州縣皆震威已並於思謙筦  
庫擢而門閥不遺美無專於辛術往服朕命是惟汝能  
代宰臣以下謝進徽宗實錄賜宴表

史述信書昭揭先猷之盛恩霑邇列式均嘉宴之私仰  
佩寵榮深深感涕

中謝

共以徽宗皇帝文周經緯道合

希夷禮樂粲然復興刑罰措而不用垂裳平治邁三代  
之英風脫屣崇高躡二皇之遐武於鑠岩廊之美有光

竹帛之傳中偶兵戈蕩然埃燼爰極網羅之力遂臻纂緝之成事不一書誅奸諛於既死言非虛美質鬼神而無疑豈期法酒之陳迺及素餐之列撫存若此報稱謂何茲蓋伏遇皇帝陛下情篤孝思德先仁政克濟中興之業能昭下武之功揭大訓以麗天方切羹牆之感賁殊恩如湛露遂加柱石之微臣等獲際昌期浸登顯仕有頌其首既膺魚藻之歡惟既厥心少竭鹽梅之報

代宰臣賀收復河南州縣表

善師不陳初無攘敵之勞文德誕敷坐受歸疆之請一

人有慶四海交懽

中賀

竊以炎正中微適際阨危之運

北兵南下盡罹鋒鏑之留荼毒中原荐食上國惟昊穹  
之悔禍致勅敵之乞盟通使乞盟蓋自舞干之格神州  
赤縣遂無血刃之傷王綱所加車書同道宣王復文武  
之土永固洪基齊人歸鄆謹之田不失舊物旄倪鼓舞  
宇宙廓清恭惟皇帝陛下聖敬日躋勇智天錫懷禁暴  
安民之志捐窮兵黷武之心

缺

單于

缺

朝本聖

人以天下為度干戈載戢大凝復古之勛師徒不勤自  
獲和我之福事載竹帛功光祖宗臣等猥以庸材叨居  
近弼一心盡節獲聞五利之謀再拜奉觴願上萬年之  
壽

代宰臣賀正旦雪表

三微更始正王道之大端六出飛花兆年豐之嘉慶自  
近及遠式舞且歌

中賀

竊以葭律移灰方陬月棣通之

際椒花獻頌正洪禧萃聚之時蓋聖人之德無加則天

瑞應誠而至葵心向日方瞻鳳歷之頒柳絮因風已發  
兔園之詠雜軒墀之玉砌成宮闕之瑤臺寔一人有慶  
之符示百穀用成之應良史直筆已書尺地之珍太師  
陳詩行播千倉之什茲蓋恭遇皇帝陛下履端於始與  
物為春惟盛德上合於天故圓穹不愛其道既頌聲之  
並作致協氣以橫流七政齊於璿璣有合璧連珠之瑞  
四時和為玉燭無鳴條破塊之災故茲五穀之精降此  
一歲之始臣濫司台柄獲覩休祥變理陰陽大懼絲毫

之亡補勤勞稼穡行觀廩廩以皆盈仰望龍顏徒深黿

抃

庾肩吾謝歷啓拂瑄  
移灰識權衡之有度

代皇子謝明堂加恩表

展采合宮克達明禋之薦均釐宣室遽叨惠術之頒遜

避莫從震驚罔措

中謝

竊以聖人饗帝式虔報本之誠

孝子事親必極寧神之奉亶哲王之稽古嚴烈考以配

天吉既卜於秋辛禮遂行於陽館用薦一人之馨德聿

來四表之歡心咸造在庭獲覩彌文之講並受其福誕



霑大澤之流臣襲慶星潢駢暉寶萼勉飭溫良之行愧  
無歧嶷之資建旄設旆節擁雙城之貴剖符錫壤爵超  
五等之崇逮茲熙事之成復冒寵章之及轅田加厚圭  
賦增腴拜賜甚榮撫躬知感此蓋伏遇皇帝陛下廣運  
帝德克享天心比及三年屬有宗祧之事錫厥五福故  
使子孫無忘致此明綸被於弱植臣敢不祇承徽數益  
迪令猷學禮學詩恪謹過庭之訓惟忠惟孝誓堅衛社  
之心

代普安郡王謝賜第表

奉藩王室將從外郎之安築第神京遽拜大君之貺俯

惟虛受內積愧懷

中謝

切以世祖推恩長安列六子之

舍明皇廣愛華清建百孫之居未聞弱植之微臣獨庇

中都之大厦是惟隆典有掩前修臣德陋中和器慚奇

穎出從外傳粗讀河間之書入侍嚴宸曾乏東平之善

荷龍光之俯逮顧魯鈍以難任渠門赤旂已峻將壇之

拜玄冕朱紱更兼王爵之封豈期十札之頒遽奉一區

之賜敬高閣於吉壤分清禁之餘光乃寢乃興遂偃仰  
棲遲之樂既怡既懌無囂塵湫隘之虞豈惟拜命之悌  
懽固且隆基於久大茲蓋伏遇皇帝陛下治先睦族義  
重隆親胡不飲焉鑒獨行於杖杜式相好矣歌攸芋於  
斯干故茲宮室之成特壯根本之輔臣敢不仰銘睿德  
益勵臣衷夏屋渠渠每念滿盈之戒小心翼翼誓堅忠  
孝之誠

代邊將謝賜春衣表

聖主疇勞載錫春成之服戎亭拜命咸叨天賜之恩稽

首歡呼省躬感厲

中謝

切以楚人挾纊彰拊循士卒之

能漢祖解衣得駕馭英雄之術蓋君之視臣尚思於足  
體則下之報上當務於捐軀洪惟清朝高視前古既九  
月舉授衣之典復三春施賜帛之仁駐輦聞詩常有及  
時之喜與袍同澤深懲偕作之非遂致無庸亦霑大賚  
茲蓋伏遇皇帝陛下握乾立極乘震當陽服先武之大  
冠久茲得衆愛韓昭之弊袴必以旌功方陽律之始回

念征夫之在遠爰出有司之幣以為公子之裘萬里乘  
邊未著七擒之績十行頒札遂膺一襲之恩拜貺甚優  
論疇何有臣敢不書紳佩德欽衽思忠揭竿為旗誓奮  
犀渠之勇何戈與袂庶逃鷙翼之譏

代狀元以下謝賜中庸篇表

禮經貽訓載先儒明道之言宸翰擣華賁新進服膺之  
寵仰拜楓庭之貺蔚為桂籍之光展誦兢惶珍藏榮耀  
中謝切以道淪彫喪學昧中庸知者過之望門庭而莫

造小人反是納陷阱以冀知或卑污仍甚陋之途而矯  
激肆至高之行惟顏氏擇乎而弗失得窮夫子之言至  
荀卿守焉而不詳遂墮孟軻之學雖道之不行已久幸  
天之未喪於斯洪惟熙朝特興絕學蓋百世俟聖人之  
作致諸儒識君子之歸恭惟皇帝陛下廣大精微聰明  
聖智得執中之一貫是傳之湯用好問之兩端斯以為  
舜達治國九經之義知修身三德之原乃瞻鯁生未明  
輿旨述天聖甚盛之舉采子思不刊之經徒載空言炳

若日星之著特形妙墨粲然雲漢之垂俾之勉強而行  
庶或從容而中臣等幸逢治世濫擢儒科可以終身行  
之永佩一編之戒不能替月守也益懲前轍之非

漢靈旗銘

漢元鼎五年四月南越相呂嘉賊其王及漢使者其秋  
天子遣伏波將軍博德出桂陽樓船將軍僕出豫章戈  
船將軍嚴下瀨將軍甲出零陵馳義侯遺出牂柯合其  
衆十萬會番禺以討之仍以兵事禱于泰一以牡荆畫

幡日月北斗登龍以象太一命曰靈旗太史奉之以指  
所伐明年春遂滅南越披其地為九郡始用樂舞塞于  
祠上觀其師行若破竹一舉凱旋雖廟堂制勝將士奮  
力所致然非得陰相安能成功若此其速宜有銘章紀  
神之休敢為之言曰

武有七德

禁暴為先

兵以義出

獲眷皇乾

招搖在上

聞之先古

我武維揚

當假陰助

赫赫漢室



六葉維武

越夷不賓

敢肆殫斧

皇命伏波

耀我天戈

皇禱泰壇

壯荆揭幡

是為靈旗

繪斗登龍

兩曜旁列

三星為鋒

太史奉之

以指所伐

九夷賓將

遠殄於越

蠢爾小醜

衆叛親離

烈烈王師

上天佑之

尋陘失險

石門陷陣

一舉覆亡

地析九郡

惟泰元尊

助茲有道

惟聖天子

蕩彼凶暴

洪願所指

莫我敢當

題芳千古

宜有銘章

蓮花漏銘

仁宗皇帝御宇之八載龍圖閣待制臣肅上蓮花漏法  
琢石為壺剡木為箭以測十二辰二十四氣四隅十干  
暨百刻分布晝夜成四十八箭為壺以貯其水有烏以  
注之有秤以平之有荷以承之水至刻盈則箭與蓮心

適平司辰者拱而謹視以揆景測辰雖風雨晦明靡有  
差忒時司天官以其法雖符古漏而日纏進退頗與黃  
道不合至景祐元年測驗無爽始作而用之夫日往月  
來寒暑推移以之成歲而考測盈縮辨察昏旦非假器  
物則無以仰窺神道此挈壺氏之所以作也而季世失  
官詩人興刺茲有國之先務今肅以創物之智作為新  
漏世服其精臣操筆在庭不敢甘默謹撫其事而銘之  
曰

莫神於天

靈機淵興

扶光動華

望舒登曜

晝夜推移

時積歲成

聖人揆測

挈壺適興

季嗣不綱

法制淪亡

聚櫟失次

擊戲乖常

於皇昌代

連珠合璧

疇人庀官

鳳氏司歷

聖主當陽

業業諏治

昧旦丕顯

夜分乃寐

有臣曰肅

創法來獻

琢石成壺

剡木為箭

高卑殊級

洪殺次陳

靈鳥挹注

芳荷吐吞

微若縈蠶

捷於激電

忽往倏來

鬼沒神變

登刻盈時

水浮矢飛

司辰凝目

雞人告期

晷景長短

風雨晦明

罔逃揆度

靡失虧贏

制符造化

貽則垂憲

億萬斯年

鑄芳金篆

晉白虎尊銘

晉孝武皇帝蒙三世之遺烈爰草魏正肇建丕業正月  
之吉大朝會乃能端本謹始思有以來忠諫而興治道  
遂設白虎尊於庭文武百辟有能獻直言者則發尊飲  
之誠得君子居正之義而合先王思治之意矣故當斯  
時有若劉毅裴楷之徒率皆仇然獻替無有忌諱傳曰  
國之將興必賞諫臣晉武得之其英風佳躅宜有銘詩  
而史逸其傳敢為之銘曰

攝提草歲

萬物更始

哲王履端

體元思治

於皇晉武

八堯啓祚

弊剗當塗

基荒典午

經綸肇造

政具交修

朝圖夕惟

懼其瑕尤

濟濟春朝

駿奔羣辟

拖紫紆青

編星拱極

皇軫宸慮

謹始端本

厲節導言

使之思奮

迺設厥尊

迺酌厥酒

其形伊何

坤維摯獸

其獸伊何

藜藿之守

迺飲厥直

迺醕厥忠

其飲伊何

沃心匪躬

其沃伊何

格非迪聰

天子居正

虛襟來諍

卒歲圖終

德胡不盛

文武在列

肅然改容

褒一勸百

節胡不終

有愆必繩

有過必除

無舌之甘

無言之訣

漢觴上壽

第講朝儀

杜舉存名

徒戒前非

懿範佳躅

自我作古

於萬斯年



銘詩可觀

皇宋玉牒序

紹興十一年十月宗正臣大受言宋受天命聖聖相承  
親宗咸族遠肩堯舜三代之隆興仁厚之行享維城之  
安綿二百年宗寺舊書所掌有四項厄兵戎鞠為炎埃  
陛下比命蒐訪雖總圖錄屬籍為一書而玉牒實與時  
政紀起居注相為表裏獨闕不存非所以篤叙糾合垂  
憲萬世者也臣愚欲望哀擲逸遺討論舊制以正昭穆

以壯本支備中興之盛典臣不勝狗馬心惟陛下裁擇  
制曰可仍令相臣董其事書成有旨命臣序之臣聞傳  
曰欲治其國先齊其家故親睦九族聖人以為盛帝之  
極治周人親親則有宗伯掌三族之別以辨親疎小史  
掌邦國之志以奠繫世漢興首仍秦制宗正官而歲上  
其籍於朝至唐而建寺設官玉牒屬籍各有司存其事  
愈詳矣宋有天下傳世相授於今十帝枝胄扶疎瓜瓞  
綿衍自至道中始修玉牒掌帝籍皇族昭穆之序仍命

刑部郎洎編屬籍書至咸平中臣安易修成屬籍三十  
卷祥符中臣世長言唐季衢以玉牒與史冊並驅因名  
皇唐玉牒遂詔以皇宋玉牒為名且建堂於寺而仁源  
積慶圖宗藩慶緒錄則每歲元日獻而納諸龍圖天章  
寶文閣建炎之役舉不復有皇帝中興益嚴家法以化  
天下凝旒岩廊慨然以天枝玉葉蕩無紀錄乃博求而  
總緝之俯從議臣之請而四書復備甚盛德也臣切惟  
我宋之治惇崇宗明親賢並建所以尉薦教勅之莫不

備至而戚屬感奮咸能自厲若駒駘之俊材辟疆之清  
淨歆向之學問平之賢峴勉回石之材德為宗室標的  
者驅漢駕唐而七國八王驕奢湛佚之患寂未之有璇  
源蕃衍既有圖籙而雍睦之政嘉言懿範與夫宗英事  
業可以鳴徽無窮尚闕而未著是書之成可謂備矣彼  
誦葛藟之詩形斗粟之謠者得無愧哉臣材學荒陋幸  
以文字待罪朝著既被命敢書其說以冠於篇臣謹序

盤洲文集卷二十五

欽定四庫全書

盤洲文集卷二十六

宋 洪适 撰

詞科習彙二

唐定襄道行軍大總管破突厥露布

臣靖等言臣聞王旅徂征遠問弗賓之罪天戈所指果  
收罔敵之功威震百蠻歡傾率土恭惟皇帝陛下北基  
開業經武緯文致治庶乎成康課功賢於湯武風纚露

沐掃姦慝以擴清天蓋地容躋生靈於仁壽蠡爾突厥  
警然朔方倚父兄之餘資輕國家之新造黃金載道莫  
充谿壑之求鳴鏑揚塵屢肆蠶蜂之毒由宸衷之布德  
冀邊壘之銷兵姑遲粟騎之師用進奉春之策而邊人  
忘義敵國懷貪方走聘車已負<sub>缺</sub>之<sub>缺</sub>未乾口血復

寒渭水之盟援我賊臣涉乎王畧肆其侵軼欲事窺覷  
覆載不容神明所殛臣仰承睿筭遠致天誅十萬之師  
六道並進蹈壘屠城而莫我敢遏艾旗斬將而所向無

前馬邑潛行定襄夜入首豪烏散部落虜驚疑精兵傾國而來謂智將從天而降蓋戎人輕而無整怒矜不及當車而兵機速則為神震霆不使掩耳尚守妖穴退逃鐵山詐搖尾以乞憐欲磨牙而恣螫狐疑猶豫方謀三窟以庇身蠱毒蜂貪不可一日而縱敵復將萬騎進逼陰山俘其帳千餘以隨去其牙七里乃覺疊羅施賊之孽子旋即生禽義成主賊之逆徒亦遂死獲其餘聚落盡投戈請命衿甲迎降而頡利不為牽羊銜璧之思尚

作走雉竄蒿之計已令貔虎必取鯨鯢旄頭失明既一  
清於氛祲朔風不競方大布於陽和威烈所加書契亡  
有此蓋工穹助順列聖儲休成茲不世之功允謂非常  
之慶坐明堂而獻壽行持萬歲之觴作彝器以銘功永  
紀一人之烈

唐京畿渭北鄜坊商華兵馬副元帥復京師露  
布

臣歲等言名位不同既君臣之素定神器有命豈智力



之可求故案稅不任於棟梁而燕雀焉知於鴻鵠苟聞  
奸於天位實自速於邦刑簡策所書古今共貫恭惟皇  
帝陛下聰明英武篤實輝光化民以躬為政以德優繇  
亮直賢哲萃於朝廷總攬權綱威令伸於藩屏樂歲享  
金穰之慶康時臻玉燭之和蠢爾逆臣忘夫大德六旄  
導節五分重鎮之權四履疏封兩峻真王之冊所以輕  
捐於名器欲其圖報於朝廷奈鴟梟之悖逆相承而豺  
虎之貪殘難草罔竭惓惓之節居懷缺缺之心世濟厥

凶其父已臣於安史家傳不軌乃昆復亂於盧龍偶涇人變起於京都致源休詭稱於符命遂憑叛黨輒起厲階褫紳笏而襲冕旒固已沐猴而冠逼乘輿而驚輦轂敢磨竄竊之牙盜環之惡則所不可言裂冕之情而至於此極忍肆滔天之罪輕為填海之謀毒貫堪輿怒貽宗廟萬方憤發莫不疾首而痛心九服囂騰盡欲寢皮而食肉臣自聞國難祇奉詔音即投袂以興師遂屬鞭而就道雖闔門之遭繫何以家為念滅賊以報恩維其

時矣百舍一息王事寧勞三令五申兵威已振共抵臧  
宮之掌欲然董卓之膺始以孤軍而屯渭橋雖能斷其  
首尾彼之重兵方聚苑內要當披其腹心遂會奉天行  
營副元帥渾瑊鎮國軍節度使駱元光商州節度使尚  
可孤等商秘計於幄中

缺

麾下憤一夫之射月

致萬乘之蒙塵使之乘此時以建功勲戒以誅元凶而  
取富貴皆聞言而雪泣思賈勇以風飛即日啓行剋期  
同集移軍於光秦門外築壘於米倉村前鏜臂既張

遣廷芬而出戰狼心甚熾攻華壁之方堅遂命吳鉞整  
衆以當鋒復令李潢督兵而救急蒙虎皮而直犯被鶴  
膝以爭馳兩軍相鏖終日大獲輜亂旗靡方蔽野以橫  
尸兵盡矢窮遂棄門而夜哭羣帥宣威而氣倍衆師席  
勝以鼓行彼雖延命於須臾我必乘機而撲殄遂使王  
佖將騎兵而前進復令萬頃率步卒以偕行中夜以開  
苑牆先登而拔賊柵朱旗絳日高鋒彗雲殺人之易若  
刈管近刃而勢如破竹擒段誠於伏莽心膂既亡敗令

言若摧枯爪牙已挫尚思拒轍未悟傾巢謂宮城萬雉  
之可居以武庫五兵之足恃欲為帝耳陣方布於靳西  
其如予何兵已臨於新室伏羸師而見擊收餘燼以復  
來百騎自馳十戰皆北生靈既已鼓舞乾坤於是清夷  
盡掃妖氛徑趨中禁逆首漏網輕騎竄蒿防塹師奔但  
聽有聲之馬陰陵路失漫嗟不逝之驂已馳追躡之兵  
行有俘囚之日王家再造覩父老之來迎鍾簾不移幸  
寢園之如故臣濫陪台鼎獲總戎旃不令劇盜之訖平

致使屬車之再狩免冠伏地敢逃失職之辜負斧鉞朝  
請正辱君之罪限拘軍事未副愚誠謹先布於捷書庶  
仰寬於聖慮

唐淮西行營宣慰處置使克蔡州露布

臣度等言雪霜雷電皇天申震耀之威斧鉞甲兵盛世  
赫誅鋤之怒蓋禁暴除亂有不得已者故陳師鞠旅由  
是而生焉恭惟皇帝陛下膺聖廣淵聰明神武內有撥  
亂之志姦宄繼平再獲受命之符紀綱大振九夷通道

三務成功強藩旋踵以就誅悍將草心而効順風行夏  
蜀清數路之妖氛霆擊李盧澡積年之凶德田洪正舉  
宗而向闕張茂昭掃地以歸朝獨是蔡人素為戎首偶  
三朝之含貸致四紀之逋誅養稂莠以不薊秦虎狼而  
弗拂未暇膏之鼎鑊尚冀少悛然其帶我金犀罔思所  
報自視由如羌狄不復知有朝廷包藏禍心謂一隅之  
足恃參會凶德已二缺之缺託唇齒於平盧倚腹心  
於董質刃交宰輔缺奮臂以一呼遂放兵而

四劫反形已具我伐用張世濟其凶固罪盈而惡稔天降之咎蓋運彥而祚殫八紘俟其然臍萬夫為之切齒臣恭承宸命出勞戎行誓滅賊以還朝乃奮身而督戰三軍既附咸如挾纊之溫羣旅爭先莫不投袂而起命文通道古擣其腹背委重裔公武鯁其喉牙既謀主之悲擒致堅城之繼陷尚裒餘燼輒指大邦賴光顏角洄曲之師而李愬席吳房之勝乃出秘計潛蹈賊區率九千人自文城而疾馳行六十里至張柴而少息即偃師



而治吾鞍鎧復遣卒以斷彼橋梁冒風雪以宵行出其  
不意擊鵝驚而聲亂晏然無知遂坎庸以先登得發關  
而直入凶儔散潰棄兵仗以星奔狡敵震驚訝官軍之  
天降猛獸將擒而尚憑空穴孤雛欲死而徒護危巢猶  
鞠衆以登陴敢嬰鋒而接刃勢無繇而竄難計方出於  
牽羊將執而歸於京師使大者陳諸原野念脅從之罔  
治不戮一人喜災害之不生永清四海茲蓋陛下法天  
立道與神為謀破萬口之雷同命六師而電掃皆由宸

斷成此偉功臣濫預良圖獲戡大憝受俘而獻太廟于  
以慰在天之靈

缺

庶幾示為臣之戒

唐伊麗道行軍大總管擒西突厥沙鉢羅可汗

露布

臣定方等言蠢茲醜虜背我殊恩嘉壽稱觴嘗拜解衣之  
賜瑤池刻印更叨立戟之榮輒嘯逋逃欲盟侵軼會聖  
主廣含容之德遣使人馳尉撫之詞地接笮騷文漫勞  
於諭蜀性同盤瓠聲肯變於吠堯取咄陸以建牙寇廷

州而犯塞

失二句

六師初道於金山一戰即集於處木降

獨祿而先聲已振薄曳咥而銳氣方張意其膽落以來  
歸尚敢尸居而作固裒十姓蜂屯之衆當萬人虎怒之  
威輒舒翼以旁張冀磨牙而恣齧遂令步卒遽高而列  
陣親率勁騎直北以布營妖鋒三遇而皆殲神旅七擒  
而莫遏乘其踣籍肆厥剪除都搭大酋既擒喉而漂鹵  
俟斤五弩旋泥首以投戈乃遣嗣業趨邪川以追奔獨  
與雅相提降兵而踵後賴風雪蔽天之助相雲複兼日

而行既破竹以無前尚寢薪而不悟遂連彌射直抵金  
牙彼方獵野以偷生我乃麾軍而縱擊渠魁震盪度伊  
麗以潛逃凶醜分犂舉達干而大潰方茲逋竄遽就係  
累臣已申畫疆圻修嚴亭障釋餘萌以示不殺之武收  
露齒以昭無外之仁鏤靈山而梁孫原列壤已窮於西  
海蒙溫禺而染尸遂獻俘行告於昭陵臣無任

唐京城東北西行營都統復京師露布

臣克用等言逆賊黃巢者綠林戾氣白挺餓夫斬木揭

竿嘯仙芝而首禍蒙盾負羽涉河南以弄兵蹈藉我江  
淮虔劉我閩越所過靡不殘滅其鋒莫敢誰何毒貫蒼  
旻凶焰幾周於諸夏亂纏紫極妖氛遂鞠於上京致鑒  
輅之蒙塵舉衣冠而掃地惡逆之極古今所無雖身具  
五刑未足償生靈之憤況畿方千里豈久容凶孽之蟠  
道嵐州以行師營沙苑而布壘揮刃即戡於黃揆揚旌  
進逼於乾阮既合許蒲易定之兵奮其武怒敢率趙向  
王林之衆逆我顏行俄大獲於梁田即分屯於渭北師

既勇而素堅鬪志賊屢挫而陰有遁謀因乘攜貳之時  
共竭分犂之策繼鑿零口復拔華城乃遣楊守宗提勁  
卒以前驅仍率白志遷董利兵而先進幸三戰俱殲於  
逆黨故諸軍爭賈於英威震呼動天罔遏靈旗之銳僵  
仆蔽野尚餘踦屨之逃遂披光泰之門直造昇陽之殿  
游魂既遠怪終夜之有聲唯類猶存恨餘風之未殄

唐天下兵馬元帥復東京露布

臣某等言

云

合蕃漢十餘萬之衆馳關陝數百里而

來分兵既拔於懷州整衆即臨於橫水王師嚴靜既威  
稜凜若雷風凶徒震驚始憂懼形諸顏色尚作護巢之  
計方憑堅壁之強遂遣僕固陳西原以扼其前因命回  
紇並南山以繚其左表裏由是夾擊殺傷亦幾相當謂  
其束手以來歸乃敢埋根而決戰賴朝恩攢矢以注射  
俄馬璘奪盾以先馳勢若枯摧正交鋒而鏖戰視其輟  
亂遂乘銳以鼓行方折馘大克於老子祠而積骸已平  
於尚書谷渠魁霧散淮壖之鶴唳堪驚逆壘風清楚幕

之烏聲甚樂

漢五屬國記

漢自白登之後匈奴憑其強怙其勝信然有吞噬中國  
心歷五世無歲不有狄師漢之為邦亦且弱矣孝武奮  
然遣將遐征旌旃之所為及滌地無類單于始慄息不  
敢南望且怒昆邪王居西方不能禦王師欲召誅之昆  
邪於是始有來降謀大將息得其使以聞天子遣將軍  
去病將兵迎之以其衆四萬餘人度河來歸既至長安



以漂陰萬戶封其王而盡侯其裨王呼毒尼等四人迺  
於張掖燈煌武威金城酒泉郡地置五屬國分處其衆  
郡置一都尉治之復擇明習外國事者一人為典屬國  
時元狩之二年也夫聖人所以制四夷憫其頑蠢桀驁  
叛命不為之震怒而興師六月之伐亦有不得已者至  
慕義而頓顙則接之以禮羈縻不絕未嘗欲正朔加其  
國而禮樂政教被其人也其肯內而戚之耶武帝於昆  
邪之降乃能因其故俗存其國號雖屬朝廷而處之塞

外內使降夷忘亡而得其驩心外可以扞禦寇侮可謂策之善者也宜有文字紀其始末乃撫前事而為之書

漢武功賞官記

漢受天命一海內四方次第平獨匈奴桀驁於北垂五尺之童不輕得息而烽火侯騎間至於京師世宗即位乃大遣衛霍諸將軍出定襄雲中鴈門高闕數年之間遂浮西河絕大幕走樓煩沙漠以北震讐而不敢惕息元朔六年天子以軍士之大克獲受爵賞而欲移賣者

無所流貶乃置賞官名曰武功爵自造士而上級十七萬凡直三十餘萬金所以顯軍功而寵戰士誠良策也夫用兵上矣自昔觀睽畫以制弧矢而阪鹿之戰已興

於

缺

之時雖戴天履地皆其赤子莫不荷戈効死猶

子弟之衛其父兄然而不有刑賞以為之勸沮亦曷能盡蹈水火而無避哉夏有甘扈之役商周以征伐取天下而賞祖戮社始丁寧於誓命之間矣迨七雄爭強淬刃相屠而賞罰之科亦益密漢乘秦制斬首賜爵累一

二級以至于封侯而兵法後期若亡師者行失道者逗

撓不前者必誅無赦雖列侯將軍之尊

缺

法旋跬

已下廷尉而削為士伍贖為庶人其罰可謂嚴矣至于

豐勲偉績烏可吝靳恩寵而常科之賞亦不足為之勸

此世宗所以制武功之官而復俾軍士之流貶也是宜

士卒奮厲窮討殊鬪爭捐軀以死其敵至于排逆單于

域滅區單封胥山以臨瀚海而漢南至無王庭

缺



盤洲文集卷二十六

欽定四庫全書

盤洲文集卷二十七

宋 洪适 撰

進卷一

觀文殿大學士醴泉觀使兼侍讀除保平軍節  
度使開府儀同三司江南東路安撫大使知建  
康府兼<sub>缺</sub>行宮留守制

門下奉瓊闕以均休久賴謀猷之助佩麟符而居守有

嚴節制之權睠中外之無殊宜寵光之特異迺峻齋壇之拜仍叅宰軸之華協以剛辰孚於羣聽具官某行高而德鉅材全而器周尊所聞而高明養其氣以剛大負博極羣書之學而抗之以識縕度越諸子之才而持之以謙蚤踐禁塗越登揆路盡瘁事國苟公家之利無不為正色立朝以天下之重而自任備嘗險阻蔚有名聲懇辭勸相之勞勉循燕閒之請通班書殿嘉素志之甚高進讀經筵顧遠圖之未究惟秣陵之沃壤乃今日之



陪京襟帶江淮控扼吳楚龍蟠虎踞列山川形勢之雄  
箕張翼舒摠師旅屯營之衆付茲重寄得我宗臣盪節  
琬戈開茅津之鉅鎮衮衣繡黼視槐位之多儀用昭柱  
石之隆式畀藩維之重於戲賜旂鸞而刻命載加栢邑  
之章守管籥而擅名其企鄼侯之迹往凝報効奚瑛訓  
詞

雄武軍節度使利州路安撫使兼知興元府除  
檢校少保護國軍節度使加食邑實封制

門下十國為連樑著价藩之績九命作伯載陞帥聞之  
雄視亞保以叅華肅元戎而增重肆加褒律庸諗治朝  
具官其謀蘊沉深資函剛果自策名而委贄惟竭節以  
忘家叩楫誓江志欲清於邊祲援袍臨敵勇常冠於戎  
行頃授鉞於秦川俾總戎於蜀道屢騰捷奏夙振軍容  
國士無雙隱若長城之扞戰功第一毅然銳將之風朝  
廷倚重以無虞夷狄畏威而遐遁宜加徽數用答鴻勲  
夏篆介圭聯新旌於左棘琯戈鉞秘易要地於中條加

行爰田倍崇真食於戲授西討之遠畧朕方有法於漢  
光奏北伐之膚公汝其聿追於南仲無使六月之雅獨  
歌三代之時往究乃心以若予訓

御史中丞除禮部尚書誥

勅中執法任耳目之寄所以彈糾士大夫使蹈忠信廉  
直之域大宗伯掌邦國之禮所以辨上下定名分而嚴  
堂陛之勢分職雖殊而尊君肅臣其揆一也以爾具官  
某踐履公正節操剛方久居憲臺中立不倚繩擊姦邪

罔不震聳望實之茂隱然在人今春官闕長疇咨通服  
無以易汝昔李勉勅悍將而唐室知朝廷之尊叔孫通  
制綿蕞而漢祖知皇帝之貴朕之所以命汝者蓋將創  
儀立制以隆主威而勵臣節豈特鐘鼓玉帛云乎哉往  
哉汝諧嗣有褒擢

給事中除翰林學士詔

勅禁闥持荷夙重從臣之選鑒坡視草尤艱內相之求  
非直諒多聞不足以備咨詢非溫厚爾雅不足以當論

謨久虛此位今得偉才具官某智識通明器資宏博考

其師友漸游夏之

缺

文章麗卿雲之黼黻蚤徊

翔於邇列

缺

比擢夕郎浸更歲籥黃扉論

事繼批勅之高風青瑣宣猷罄沃心之謹議朕當國步  
紛紜而多故欲王言鼓動於羣情扶杖老民思見漢文  
之德化流涕武卒感奮奉天之制書冀得若人以宣朕  
意僉云汝可其代予言當使明綸聳四海九州之聽庶  
幾與義追三盤五誥之文汝其勉之以永終譽

戒守令勸農詔

勅朕以寡昧獲保宗廟遭時屯棘戎事未寧江浙荆淮  
之間瘡痍猶未瘳也宿兵百萬調度資糧非農無以給  
之重困吾民莫斯為甚而州縣之吏勸飭不力末技游  
食背本趨末者尚衆惕然以思靡遑朝夕冀得良吏以  
宣德意故嘗明詔大臣舉任縣令者親擢郡守臨軒勞  
遣道民之詔無歲無之比年以來吏偷弗虔慢視民事  
歲小不康則下有饑色道殣相望泰其脂膏而莫之省

憂豈朕之不德訓之有未至耶抑吏狃故習不可遽革耶夫為人師帥而田野不闢桑麻不殖戶口滋耗獄訟浸繁是師帥不賢而主德不宣也朕將何所賴為繼自今其洗心滌慮恭爾有官亂爾有政毋以朕言為墻壁虛文則汝之職時亦有無窮之聞尚或勿念勿庸惟汝大弗克祗厥辟惟予汝辜朕言不再汝其聽之

仲夏賜諸路恤刑詔

勅朕猥以眇躬嗣有不業永念愚民之衆輕干文法之

中雖畫地為牢必使之無訟故吞舟之網寧失於不經  
情每軫於鄉隅志欲期於按堵盡除苛禁已破觚而斲  
珣尚恐有司或吹毛而次骨適臨中夏爰舉舊章惟炎  
日之如焚在園扉而良苦撻笞火烈逮繫株連或罹瘐  
死之悲殊損好生之德肆頒明詔申告庶邦惟唐虞之  
畫衣冠民無犯者成康之空囹圄朕甚慕之爾其欽哉  
惟刑謹乃出令仰副哀矜之旨奉行寬大之書夫五刑  
之屬三千非先王之得已而一歲之獄數萬稽前訓而



可懲咨爾有僚咸體朕意

代宰臣以下謝進徽宗皇帝實錄賜獎諭詔表

事錄先朝甫逮一篇之奏寵形溫詔蔚為三館之光拜

賜兢慚撫躬感幸

中謝

竊以徽宗皇帝席榮華之旦乘

富有之基發政施仁必先鰥寡制禮作樂用文治平隆  
儒術以大興省刑章而幾措規恢宏遠綿九閏以憂勤  
號令坦明垂百王之模範方峙蒼梧之返俄成谷口之  
游將欲鋪張日新之雋功形容天縱之盛德必得蹇蹇

諤諤之士與遷董而比良庶幾渾渾灑灑之書追夏商而並駕中偶兵戈之厄蕩然圖策之亡採撫舊聞惟網羅之匪易搜裒遺籍極煨燼以兼收爰命有司共成大典臣等識乖五例用之三長正次王而王次春未達發端之旨事繫日而日繫月粗殫紀日之勞方茲首帙之告成遽沐十行而稱善榮冠翠綬之列恩踰華袞之褒自揆庸虛曷圖稱塞茲蓋伏過皇帝陛下昭思來孝通駿有聲誦堯之言深切羹牆之慕纂禹之緒欲光竹帛

之傳俾汗簡以圖終乃出綸而示勸臣等敢不佩服審  
訓紬尋帝謨絕筆可期敢自延於白首垂紳罔報誓將  
盡於赤心

代嗣大理國王修貢表

錫壤南交獲嗣承於家緒拜章北闕敢虔奉於國珍退  
慚不腆之儀仰瀆蓋高之聽

中謝

伏念臣九隆後裔六

詔支流踰嶺海以來賓綿漢唐而不絕永平懷遠始開  
龍尾之疆天質䟽恩爰錫馬頭之器會聖明之在御擘

道德以遭容弗以遐遺許之內屬幸藩方之世襲惟忠  
節以家傳久習華風屢沾睿澤適際首祧之始謹修任  
土之誠恭惟皇帝陛下日月照臨乾坤履燾布深仁而  
旁暨耀神武以外揚風雨順時知中國之有聖衷蠻効  
職聞盛德以皆臣仰睇前旒之敵明願削左袵而蒙化  
臣國小而偏道阻且長雖陪九譯之重莫遂五原之款  
長安在望誓堅葵藿之傾梧矢雖微少致蘋蘩之獻

晉征虜將軍征討大都督破苻堅露布

尚書兵部臣石等言臣聞師克在和故宣威而罔敵戎  
輕不整雖用衆以奚為徒誇涿野之強自取昆陽之敗  
以寡致勝在昔罕聞恭惟皇帝陛下續渡江一馬之宏  
基宅御天六龍之寶位登庸賢德總攬威權乾符坤珍  
寢底金行之盛星珠月璧已臻玉燭之調蠢彼氐酋汚  
吾帝闕嘯良家之惡少惑白虜之甘言狃代涼燕蜀之  
能掃巴漢幽并之聚獨決亂華之斷罔虞犯歲之殃固  
敗是求不亡何待臣謹與冠軍將軍元輔國將軍琰等

祇承聖畧躬履戎行暴衣露冠思狗國家之急鍍甲摩  
劍誓清凶孽之塵三令而軍法已明一鼓而人心共奮  
謂其束身而自遁乃敢怒臂以相持方虎踞於項城即  
蜂屯於洛澗遂遣缺以精卒前邁既馘梁成而逆儔

始驚士卒莫不爭先水陸由是繼進君臣落膽皆疑草  
木於公山將帥協心已挫虎狼於肥水因設謀而遣使  
俾移陣以濟師天誘其衷敵墮吾計俄主帥夷傷而大  
勦故部落殲沒以無遺鶴唳風聲訝王師之已至草行

露宿膽棄甲之相望雖已收尸而築京尚阻漆頭而為  
器臣等謬膺間寄偶殄冠鋒屬強氏百六之秋遽為戎  
首致勁卒八千之衆有此武功折衝實本於廟謀助順  
亦資於陰相奉觴漢殿願歌明主之休挂旆天山行豁  
神州之境臣等無任慶快激切屏營之至謹差某官奉  
露布以聞

唐關內兵馬副元帥復京師露布

尚書兵部臣子儀等言臣聞戎醜憑陵敢長驅而犯順

天威震耀果不陣以成功蓋帝王羽衛之所臨豈姦宄  
甲兵之可據未遑接刃皆已曳兵宗社將安幅員共快  
恭惟皇帝陛下聰明寬厚徽柔懿恭拔賢哲以當朝振  
紀綱而御宇治兵討賊隆勲業於兩京繼體承祧奉烝  
嘗於九廟蠹茲羌種雄于西陲人有獸心初不知於信  
誓首垂狐尾惟獨喜于戰爭蓋由中朝方幸於內寧故  
釋遠方以為之外懼乍臣乍叛屢殘馘于華人弗慮弗  
圖久遁逃於天討薦興兵草盡取河隍初螳聚于神州



即鴟張於帝闕倚涇州之叛將敢肆姦謀迫邠郎之皇  
孫致奸大位上天既已震怒率土皆欲分犁臣投閒方  
事於枕戈聞難即思於齒劍人惟求舊既復建於鼓旗  
國爾忘家即廣哀於車騎緣兵權之既解集部曲以惟  
艱孤鋒方頓於咸陽凶焰已臨於渭水得張知節合軍  
而少振屯上洛郡簡兵以大蒐而星孛紫垣颺回赤縣  
候四望之陘雖知蠶尾之無能留七盤之軍政恐豚孺  
之尚捍遂遣長孫緒出藍田而觀勢仍令第五琦攝京

兆以偕行擊鼓譟山若雷霆之方震張旗紿敵雖草木  
以皆驚賴仲卿渡澧水以揚先聲而王甫譟苑中以為  
內應酋豪落膽意大軍之已來種聚奉頭盡中宵而潛  
潰臣既出師以追醜類即入城而撫遺氓惟府庫蕭然  
一空獨宮闕儼如其故室家相慶牛酒爭持幸皇祚之  
既寧喜官儀之復見貌貅遠逐長狄行覩於搆戈雉兔  
既逃尸逐少穡於染血茲蓋高穹之所眷佑列聖之所  
憑依成茲却敵之勲不俟交兵之力刻忠而著金石慚

無汗馬之勞清道以迎乘輿實切回鑒之望臣無任慶  
快激切屏營之至謹差某官奉露布以聞

唐戶部侍郎平原太守河北招討採訪使移清  
河諸郡討安祿山檄

天寶十五載二月某日戶部侍郎平原郡太守河北招  
討採訪使真卿移清河博平諸郡太守蓋聞食土之毛  
既已莫非臣子儋人之爵毋寧坐視寇讐敢布心腹之  
辭共竭股肱之力我國家受天明命卜世過于商周享

國百年致治追於文景高祖肇基大業太宗剪難羣凶  
我皇帝厚德格於上天深仁被於綿宇而賊臣安祿山  
者犬羊餘噍螻蟻餓俘荷三道之重權積十齡之異志  
忘推食解衣之德奮裂冠毀冕之謀鳴鏑揚塵蹂北土  
萬里之地長戈指闕孛太微五帝之庭僭擬乘輿污穢  
宮禁罄南山之竹書罪無窮決東海之波滌瑕不足神  
人共怒天地靡容真卿世受皇恩身膺郡寄誓捐軀而  
効死不與賊以俱生增陴浚隍為日已久菟乘補卒固

敵是求勵平原之兵已多多而益辦仰清河之粟更陳  
陳而相因英雄皆投石之才驍銳有成林之衆以此制  
敵何敵不摧以此攻城何城不克公等王侯華胄師帥  
重權方當此搖蜂毒以長驅豈不能聞鷄鳴而起舞宜  
各陳其師旅以共濟於國家或搯其吭或斷其臂或趨  
汲鄴以潰其胷腹或徇河洛以鯁其喉牙帥茲西向之  
鋒制其北走之路同濟非常之業式隆再造之勲義士  
忠臣各協乃力皇天后土實佑此行毋懷恤緯之心致

失投機之會

唐中書侍郎同中書門下平章事兼河南節度  
採訪處置使都統淮南諸軍事某告浙東浙西淮  
南青州濠州救睢陽檄

至德二載八月某日中書侍郎同中書門下平章事兼  
河南節度採訪處置使都統淮南諸軍事告浙東節度  
使李君浙西節度使司空君淮南節度使高君青州節  
度使鄧君濠州刺史閭丘君夫夷凶靖難事實在於人

臣救患分災職莫先於侯伯方孤壘外當於劇盜宜近  
藩各舉於助兵是興糾合之言式濟艱難之急惟國家  
升平之既久故干戈朽鈍而不支羯奴攘臂以長驅甲  
士奉頭而皆北狐鳴帝里鷓鴣峙神州皇圖如累卵之危  
大駕有蒙塵之役獨張金吾拔雍丘之衆同許中丞守  
睢陽之城志在本朝誓粉身而糜骨氣吞逆賊常嚼齒  
以穿齧而尹子琦將同羅之逆傳合楊朝宗收寧陵之  
餘燼交戰未嘗虛日合圍迨且經年獨沮妖鋒遂壓潰

於梁宋能嬰危堞獲遮蔽于江淮雖奮羸起病以相持  
柰鞠頑哀凶而孔熾援師既絕無虵蜉蟻子之一來軍  
食已窮至雀鼠馬羣之皆罄惟是孤危之極在乎頃刻  
之間儻堅壁之不能遂橫行而莫遏繫此一邦之勝敗  
實為諸道之安危唇既亡則齒必寒皮不存則毛安傳  
當軫恤鄰之念咸堅報國之忠幕府無樽俎之奇謀玷  
機衡之重任寵分驛節建大將之鼓旗遠奉虎符發精  
兵於郡國公等十連分閫千騎長人或專淮浙之權或



佩青濠之寄想枕戈之久矣聞傳檄而欣然要當奮同  
心舉功名之思毋或懷全軀保妻子之計正同虞虢猶  
輔車之相依毋若越秦視肥瘠而不恤

盤洲文集卷二十七